

Na osnovu člana 252. a u vezi sa članom 178. Zakona o osnovama sigurnosti saobraćaja na cestama u Bosni i Hercegovini ("Službeni glasnik BiH", br. 6/06, 75/06, 44/07, 84/09 i 48/10), ministar komunikacija i prometa, u saradnji sa organom nadležnim za obrazovanje, donosi

PRAVILNIK

O IZMJENAMA I DOPUNAMA PRAVILNIKA O UVJETIMA I NAČINU ZA DOBIJANJE LICENCE

Član 1.

U Pravilniku o uvjetima i načinu za dobijanje licence ("Službeni glasnik BiH", br. 12/07 i 41/07) (u daljem tekstu: Pravilnik), član 1. mijenja se i glasi:

"Član 1.

(Predmet Pravilnika)

Ovim Pravilnikom propisuju se uvjeti i način za dobijanje licence predavača teoretske nastave, ispitivača iz teoretskog dijela ispita, ispitivača iz upravljanja motornim vozilom, ispitivača iz poznavanja prve pomoći, postupak izdavanja licence i evidencija u vezi s tim."

Član 2.

Član 2. mijenja se i glasi:

"Član 2.

(Licenca predavača teoretske nastave)

Pravo osposobljavanja i polaganja ispita za dobijanje licence predavača teoretske nastave ima diplomirani inženjer saobraćaja, cestovni smjer (VII stepen stručne spreme, najmanje 240 ECTS bodova), koji ima vozačku dozvolu "B" kategorije."

Član 3.

Član 3. mijenja se i glasi:

"Član 3.

(Licenca ispitivača iz teoretskog dijela ispita)

Pravo osposobljavanja i polaganja ispita za dobijanje licence ispitivača iz teoretskog dijela ispita, ima:

- a) diplomirani inženjer saobraćaja, cestovni smjer (VII stepen stručne spreme, najmanje 240 ECTS bodova), koji ima vozačku dozvolu "B" kategorije, ili lice koje ima VII stepen stručne spreme, najmanje 240 ECTS bodova i najmanje godinu dana iskustva na poslovima sigurnosti saobraćaja.
- b) inženjer saobraćaja, cestovni smjer (VI stepen stručne spreme, najmanje 180 ECTS bodova) i najmanje godinu dana iskustva na poslovima sigurnosti saobraćaja."

Član 4.

Član 4. mijenja se i glasi:

"Član 4.

(Licenca ispitivača iz upravljanja motornim vozilom)

Pravo osposobljavanja i polaganja ispita za dobijanje licence ispitivača iz upravljanja motornim vozilom, ima:

- a) diplomirani inženjer saobraćaja, cestovni smjer (VII stepen stručne spreme, najmanje 240 ECTS bodova), ili diplomirani pravnik (VII stepen stručne spreme, najmanje 240 ECTS bodova), ili diplomirani inženjer mašinstva (VII stepen stručne spreme, najmanje 240 ECTS bodova), ili lice koje ima obrazovanje nastavno-pedagoškog smjera (VII stepen stručne spreme, najmanje 240 ECTS bodova) i najmanje godinu dana radnog iskustva na poslovima osposobljavanja kandidata za vozače ili instruktora vožnje u autoškoli;

- b) inženjer saobraćaja, cestovni smjer (VI stepen stručne spreme, najmanje 180 ECTS bodova), ili lice koje ima obrazovanje nastavno-pedagoškog smjera (VI stepen stručne spreme, najmanje 180 ECTS bodova) i najmanje dvije godine radnog iskustva na poslovima osposobljavanja kandidata za vozače ili instruktora vožnje u autoškoli;
- c) lice koje ima V stepen stručne spreme, cestovni smjer i najmanje tri godine radnog iskustva na poslovima osposobljavanja kandidata za vozače ili instruktora vožnje u autoškoli;
- d) lice koje ima IV stepen stručne spreme, cestovni smjer i najmanje četiri godine radnog iskustva na poslovima osposobljavanja kandidata za vozače i instruktora vožnje u autoškoli."

Član 5.

Iza člana 4. dodaje se novi član 4a. koji glasi:

"Član 4a.

(Licenca ispitivača iz poznavanja prve pomoći)

- (1) Licenca ispitivača iz poznavanja prve pomoći izdaje se licu koje ispunjava slijedeće uvjete:
 - a) da posjeduje licencu doktora opće medicine i
 - b) da posjeduje vozačku dozvolu "B" kategorije."

Član 6.

Iza člana 6. dodaje se novi član 6a. koji glasi:

"Član 6a.

(Zahtjev za licencu ispitivača iz poznavanja prve pomoći)

- Uz zahtjev za izdavanje licence ispitivača iz poznavanja prve pomoći prilažu se slijedeći dokumenti:
- a) ovjerena kopija licence doktora opće medicine,
 - b) kopija vozačke dozvole "B" kategorije i
 - c) dokaz o uplati naknade za izdavanje licence."

Član 7.

Član 12. mijenja se i glasi:

"Član 12.

(Održavanje ispita)

- (1) Ispit za dobijanje licence iz čl. 2., 3. i 4. ovog Pravilnika održava se u zavisnosti od broja prijavljenih kandidata.
- (2) O mjestu i vremenu održavanja ispita, organ nadležan za obrazovanje, obavještava prijavljene kandidate najkasnije 7 dana prije zakazanog ispita."

Član 8.

Član 13. mijenja se i glasi:

"Član 13.

(Sadržaj testova)

- (1) Testove za polaganje ispita iz poznavanja propisa o sigurnosti saobraćaja na putevima, priprema i izdaje organ nadležan za obrazovanje, u skladu sa Planom i programom iz člana 5. ovog Pravilnika, koristeći Katalog testovnih pitanja koji objavljuje Ministarstvo komunikacija i prometa Bosne i Hercegovine.
- (2) Testovi iz stava (1) ovog člana sadrže pitanja sa jednim ili više tačnih odgovora."

Član 9.

Član 17. mijenja se i glasi:

"Član 17.

(Sadržaj i trajanje ispita)

- (1) Pismeni dio ispita iz člana 14. stav (1) ovog Pravilnika sadrži 90 pitanja i traje maksimalno 90 minuta.
- (2) Pismeni dio ispita iz člana 15. stav (1) ovog Pravilnika sadrži 70 pitanja i traje maksimalno 70 minuta.

- (3) Pismeni dio ispita iz člana 16. ovog Pravilnika sadrži 70 pitanja i traje maksimalno 70 minuta.
- (4) Na usmenom dijelu ispita iz čl. 14., 15. i 16. ovog Pravilnika kandidat izvlači listić koji sadrži pet pitanja.
- (5) Praktični dio ispita iz člana 16. ovog Pravilnika traje najmanje 25 minuta.
- (6) Kandidat koji polaže ispit iz člana 16. ovog Pravilnika dužan je za potrebe provođenja ispita osigurati tehnički ispravno, propisno opremljeno i čisto motorno vozilo "B" kategorije.
- (7) Za vrijeme trajanja praktičnog dijela ispita iz člana 16. ovog Pravilnika kandidat je dužan pratiti, provjeravati i ocjenjivati vožnju drugog lica.
- (8) Položen ispit iz poznavanja propisa o sigurnosti saobraćaja na putevima važi godinu dana od dana polaganja."

Član 10.

U članu 20. mijenja se naziv člana, koji sada glasi: "Član 20. (Odjava ispita)".

Mijenja se stav (1) koji sada glasi:

- "(1) Kandidat koji iz opravdanog razloga nije u mogućnosti pristupiti zakazanom ispitu, dužan je odjaviti ispit najkasnije do početka zakaznog termina polaganja, u suprotnom smatrat će se da ispit nije položio."

Član 11.

Član 21. mijenja se i glasi:

"Član 21.

(Greške na ispitu iz vožnje u ulozi ispitivača)

- (1) Na praktičnom dijelu ispita za ispitivača iz upravljanja motornim vozilom ispitivač je dužan evidentirati greške kandidata.
- (2) Za evidentiranje i vrjednovanje grešaka iz stava (1) ovog člana koristi se postupak i obrazac propisan Pravilnikom o načinu i uvjetima organiziranja ispita za vozača motornih vozila ("Službeni glasnik BiH", broj 46/12)."

Član 12.

Član 26. mijenja se i glasi:

"Član 26.

(Organ nadležan za izdavanje licence)

- (1) Kandidatu koji položi ispit radi dobijanja licence iz čl. 2., 3. i 4. ovog Pravilnika izdaje se uvjerenje o položenom ispitu na obrascu koji je Prilog broj 4. i čini sastavni dio ovog Pravilnika, a zatim odgovarajuću licencu.
- (2) Uvjerenje i licencu iz stava (1) ovog člana izdaje organ nadležan za obrazovanje, koji je imenovao komisiju pred kojom je kandidat položio ispit.
- (3) Licencu iz člana 4a. ovog Pravilnika izdaje organ nadležan za obrazovanje, prema mjestu prebivališta podnosioca zahtjeva.
- (4) Lice kojem se izda licenca, u skladu sa odredbama ovog Pravilnika, mora ispunjavati propisane uvjete za vrijeme važenja licence."

Član 13.

Član 27. mijenja se i glasi:

"Član 27.

(Značenje i trajanje licence)

- (1) Lice koje dobije licencu za predavača teoretske nastave dobija i licencu za ispitivača teoretskog dijela ispita, a ako ima dozvolu vozača instruktora vožnje i najmanje jednu godinu radnog iskustva na poslovima obuke kandidata za vozače ili instruktora vožnje u autoškoli dobija i licencu ispitivača iz upravljanja motornim vozilom.

- (2) Licenca ispitivača iz upravljanja motornim vozilom važi za one kategorije koje kandidat posjeduje kao instruktor vožnje.
- (3) Licenca iz čl. 2., 3., 4. i 4a. ovog Pravilnika izdajese na period važenosti od pet godina, s pravom produženja važenosti.
- (4) Prilikom produženja licence iz čl. 2, 3. i 4. ovog Pravilnika podnosilac zahtjeva prilaže dokaz da je u periodu od dana izdavanja licence pa do podnošenja zahtjeva prisustvovao na najmanje dva stručna usavršavanja, koja organizira organ nadležan za obrazovanje."

Član 14.

U članu 29. stav (1) u tački d), na kraju drugog reda, interpunkcijski znak "tačka" zamjenjuje se interpunkcijskim znakom "tačka zarez" i dodaje se nova tačka e) koja glasi:

"e) licenca ispitivača iz poznavanja prve pomoći je bijele boje i prikazana je na obrascu Prilog broj 10. i čini sastavni dio ovog Pravilnika."

Član 15.

Član 31. mijenja se i glasi:

"Član 31.

(Registri)

- (1) Za svaku vrstu izdate licence organ nadležan za obrazovanje vodi registar.
- (2) Registar o položenim ispitima i izdatim licencama predavača teoretske nastave, ispitivača teoretskog dijela ispita i ispitivača iz upravljanja motornim vozilom sadrži:
 - a) redni broj licence,
 - b) prezime i ime i ime jednog roditelja imaoa,
 - c) adresu stanovanja,
 - d) datum i mjesto rođenja,
 - e) datum polaganja ispita,
 - f) datum izdavanja licence,
 - g) datum oduzimanja licence,
 - h) vrstu i broj izdate licence i
 - i) napomenu.
- (3) Registar iz stava (2) ovog člana se vodi na obrascu Prilog broj 9. i čini sastavni dio ovog Pravilnika.
- (4) Registar licenci ispitivača iz prve pomoći sadrži:
 - a) redni broj licence,
 - b) prezime i ime i ime jednog roditelja imaoa,
 - c) adresu stanovanja,
 - d) datum i mjesto rođenja,
 - e) datum izdavanja licence,
 - f) datum oduzimanja licence i
 - g) napomenu.
- (5) Registar iz stava (4) ovog člana vodi se na obrascu Prilog broj 11. i čini sastavni dio ovog Pravilnika.
- (6) Registri iz st. (2) i (4) ovog člana se zaključuju na kraju svake kalendarske godine i čuvaju se kao dokumenti trajne vrijednosti."

Član 16.

Član 33. briše se.

Član 17.

(Stupanje na snagu)

Ovaj Pravilnik stupa na snagu prvog dana od dana objave u "Službenom glasniku BiH".

Broj 01-02-2-585/13
08. februara 2013. godine
Sarajevo

Ministar
Damir Hadžić, s. r.